



Mehanizam za međunarodne krivične sudove ("MMKS" ili "Mehanizam") osnovao je Savjet bezbjednosti Ujedinjenih nacija 22. decembra 2010. da nastavi nadležnosti, prava, obaveze i ključne funkcije Međunarodnog krivičnog suda za Ruandu ("MKSR") i Međunarodnog krivičnog suda za bivšu Jugoslaviju ("MKSJ") nakon okončanja njihovih mandata.

PODACI O PREDMETU

Trenutno je u bjekstvu osam osoba protiv kojih je MKSR podigao optužnice za učesće u genocidu u Ruandi 1994. godine. Mehanizam ima nadležnost nad sljedećom trojicom optuženih: Augustinom Bizimanom, Félicienom Kabugom i Protaisom Mpiranyom. Vlastima u Ruandi proslijeđeni su predmeti protiv preostalih pet bjegunaca: Fulgencea Kayisheme, Charlesa Sikubwabo, Aloysa Ndimbatija, Ryandikayoa i Phénéasa Munyarugarama. Još jedan bjegunac čiji je predmet proslijeđen u Ruandu, Ladislav Ntaganzwa, uhapšen je u Kongu 9. decembra 2015.

MICT-12-13

BJEGUNAC - CHARLES SIKUBWABO



Charles Sikubwabo je bio načelnik (*Bourgestre*) okruga Gishyita u pokrajini Kibuye, Ruanda, u vrijeme kada su počinjeni zločini navedeni u optužnici

Godina i mjesto rođenja

Početak ili sredinom 40-ih godina 20. vijeka, okrug Gishyita, prefektura Kibuye, Ruanda

Optužnica

Važeća optužnica podignuta 20. oktobra 2000.

Status predmeta

U bjekstvu od 28. novembra 1995.

ISTORIJAT POSTUPKA

OPTUŽNICA

Charles Sikubwabo je pred MKSR-om optužen za genocid, saučesništvo u genocidu, udruživanje radi vršenja genocida i zločine protiv čovječnosti, počinjene u okrugu Gishyita, prefektura Kibuye, u Ruandi, tokom mjeseca aprila 1994., u vrijeme kada je bio načelnik (*Bourgestre*) tog okruga.

Prema navodima optužnice, tokom mjeseca aprila 1994., veliki broj muškaraca, žena i djece iz raznih mjesta potražio je zaštitu od napada i ubistava civila koja su se dešavala širom prefekture Kibuye. U optužnici se navodi da su se mnogi okupili unutar kompleksa Mugonero, koji se sastojao od nekoliko zgrada, uključujući crkvu, ambulantu i bolnicu, kao i da su većina tih muškaraca, žena i djece bili pripadnici naroda Tutsi i nenaoružani. U optužnici se dalje navodi da je ujutro 16. aprila 1994. ili približno tog datuma, konvoj od nekoliko vozila iza kojih je išao veliki broj naoružanih pojedinaca ušao u kompleks Mugonero. U optužnici se dalje navodi da su se među pojedincima u tom konvoju nalazili, između ostalih, Sikubwabo, pripadnici Nacionalne žandarmerije, policijskih snaga okruga, paravojske i civili. Takođe se navodi da su pojedinci iz konvoja, uključujući Sikubwabo, učestvovali u napadu na muškarce, žene i djecu koji su se nalazili u kompleksu Mugonero koji je trajao tokom cijelog tog dana. Prema navodima optužnice, napad je za posljedicu imao smrt na stotine muškaraca, žena i djece koji su potražili utočište u kompleksu i ranjavanje velikog broja njih.



U optužnici se dalje navodi da je u mjesecima koji su uslijedili nakon napada na kompleks Mugonero, Sikubwabo, između ostalih, tragao za preživjelim Tutsijima i drugima, napadao ih, ubijao i nanosio im teške tjelesne ili duševne povrede.

Optužnica sadrži sljedeće optužbe:

Jedna tačka za genocid (tačka 1A) ili, alternativno,

Jedna tačka za saučesništvo u genocidu (tačka 1B)

Jedna tačka za udruživanje radi vršenja genocida (tačka 2)

Tri tačke za zločine protiv čovječnosti

- Ubistvo (tačka 3)
- Istrebljivanje (tačka 4)
- Druga nehumana djela (tačka 5)

PROSLJEĐIVANJE PREDMETA U RUANDU

Dana 26. marta 2012., MKSR-ovo Vijeće za prosljeđivanje naložilo je da se predmet protiv Charlesa Sikubwabo prosljedi vlastima Republike Ruande.

Dana 7. maja 2014., sudija Vagn Joensen, sudija-pojedinac, izdao je nalog za hapšenje i nalog za prebacivanje kojima se od svih država članica UN-a traži da lociraju, uhapse i predaju Sikubwabo u nadležnost Državnog javnog tužilaštva Republike Ruande.

U skladu s Rezolucijom Savjeta bezbjednosti 1966 (2010), sve države imaju obavezu da sarađuju s MMKS-om na lociranju, hapšenju, pritvaranju, predaji i prebacivanju optuženih koji su još u bjekstvu.